

Inissianik attartortitsisarneq pillugu Inatsisartut inatsisissaattut siunnersuut

(Ineqarnermut, Attaveqaasersuutitut, Isorliunerusunut Upalungaarsimanermullu Naalakkersuisoq)

Saqqummiussineq

(Ineqarnermut, Attaveqaasersuutitut, Isorliunerusunut Upalungaarsimanermullu Naalakkersuisoq)

Siullermeerneqarnera

Naalakkersuisut sinnerlugit inissianik attartortitsisarneq pillugu Inatsisartut inatsisissaattut siunnersuut saqqummiuppara.

Ineqarnermut inatsisit atuuttut katersuunneqarnissaat nutarterneqarnissaallu siunertaralugu siunnersuut saqqummiunneqarpoq. *Inissianik attartortitsisarneq pillugu Inatsisartut peqqussutaat* atuuttoq ukiut ingerlanerini arlaleriarluni allanngortinneqartarsimavoq. Tamatuma kingunerisaanik maleruagassat, ullumikkut paasiuminaannerusutut inissisimasut, aammalu ineqarnerup maannakkut aqqissuussaananeranut naleqqutinngitsunik ilaqartut atuutsinneqarput.

Siunnersuummi Inatsisartut inatsisaannut ataatsimoortumut ataatsimut maleruagassat katersorneqarput nutarterneqarlutillu. Siunnersuutip annersaani inatsisit atuuttut amerlanersaat ingerlateqqinneqarput, kisiannili aamma siunnersuut najoqqutassani ataasiakkaani allannguutinik erseqqissaanernillu imaqarpoq.

Tamatuma peqatigisaanik siunnersuut Namminersornerup atuutilernerata kingorna ineqarnermi ineriartornermut naleqqussarneqarpoq, tassungalu inissiaatileqatigiiffiit Namminersorlutik Oqartussanit kommuninillu pigineqartut pilersinneqarsimanerat, kiisalu suleriaaseq, pisortat inissiaataannik aqutsinermi ineriartorsimasoq ilaatinneqarput.

Siunnersuut maleruagassat paasiuminarnerulernissaannut aammalu ineqarnermi suleriaatsip assigiiaarnerulernissaanut iluaqutaassaaq, tamatumalu peqatigisaanik ineqarnermik aqqissuusseqqinnermi ingerlasumi qitiusumik inissisimassaaq. Siunnersuut aqqissuusseqqinnermi ersarinnerulersitsinissamik, pisortat inissiaataasa ingerlanneqarnerisa pitsaanerulernissaanik, ineqarfiit aningaasaqarnerisa oqimaaqatigiinnissaannik aammalu attartornermut sinaakkutissat ersarinnerulernissaannik anguniagaqarnermut tapertaassaaq.

Siunnersuummi immikkoortut pingaarnerit uku erseqqissaatigerusuppakka:

- Attartornermut inatsisit Inatsisartut inatsisaannut iluarsaatamut ataatsimut, inissianik attartortitsisarneq pillugu Inatsisartut peqqussutaannik atuuttumik taarsiisussamut katersorneqassapput.
- Siunnersuutip atuuffissaa ersarissarneqarpoq. Siunnersuut illunik aammalu ininik aalajangersimasumik najugaqarfissatut attartortitsinernut, tassungalu ilanngullugu attartortitseqqinnernut atuuttussaavoq, tassanilu attartortoq inuussaaq. Taamaalilluni inuussutissarsiornerinnarmut attartortitsinerit attartornerillu suliffeqarfinnik attartortoqartut Inatsisartut inatsisaannut ilaatinneqanngillat.
- Namminersorlutik Oqartussat kommunillu inissiaataannik attartortittakkani, aqutsineq, aningaasaqarnermik aqutsineq aammalu pilersaarutaasumik piffissalikkamik aserfallatsaaliuineq pillugu maleruagassat katersuunneqarput erseqqissarneqarlutillu, assigiinnerusumik suleriaaseqarnissaq siunertaralugu.
- Ineqarneq pillugu Maalaaruteqartarfiup piginnaatitaaffiisa annertusineqarput, taamaalillunilu inissianik attartortittakkanik namminersortunit pigineqartunik attartortut inuinnaat aqqiagiinnginnerit pillugit maalaaruteqartarfimmut tunniussisinnaalissapput.

Tamanut ammasumik tusarniaaneq, tamatumalu kingunerisaanik politikkikkut oqallinnerit siunnersuummi ataasiakkaanik iluarsiinissamut tunngavissiipput. Allannguut aneq siunnersuutip atuuffissaanut tunngasuuvuq, taassumalu erseqqissarneqarnerani allassimalerpoq, attartortoq suliffeqarfiutillugu attartornerit siunnersuummut ilaajunnaartut. Taamaalilluni siunnersuut attartornermut inunnik attartortoqartunut, aammalu inissianut aalajangersimasumik najugaqarfigineqartussanut siunnerfilerneqarpoq. Assersuutigalugu suliffeqarfik inissiamik suliffeqarfimmit allamit attartorneqarpat inatsisip atorneqartussaannnginneranik tamanna isumaqarpoq.

Tamatuma peqatigisaanik inunnut attartortitseqqinnermi ineqarnermut akiliutip aalajangersarneqartarneranut maleruagassat qanoq atorneqassanersut erseqqissarneqarpoq. Aamma suliffeqarfiup inissiaq inummut aalajangersimasumik najugaqarfissatut attartorteqqippagu maleruagassat atuutissapput.

Naalakkersuisunit Inatsisartut siunnersuummik suliaqarnissaat qilanaarineqarpoq, aammalu suliap Inatsisartuni ingerlateqqinneqarnerani aamma ataatsimiititaliamut attuumassuteqartumut innersuussisoqassappat suliaqartoqarnerani, tassungalu ilanngullugu tekniikkimut tunngasunik misissuinnermi apeqquteqartoqarneranilu akissuteqarnissamut ikiuunnissamut piareersimapput.

Taamatut oqaaseqarlunga Naalakkersuisut sinnerlugit immikkoortoq Inatsisartuni sularineqartussatut tunniuppara.